



**2022-7**

16. december 2022

All. nr./notatnr.:

2022-907-0002-14

Sull./sagsbeh.:

**Sulisup isiminik suliaritinneranut aningaasartuutunik  
akiliisimanermik isornartorsiuneq**

*Kommuneqarfik Sermersuup sulisumi isimigut suliaritinneranut aningaasartuutit akilersimagai tusagassiuutini 30. marts 2022-mi allaaserineqarpoq.*

*Ombudsmandi 31. marts 2022-mi aalajangerpoq pisoq pillugu nammineerluni misissuiffiginninnermik aallartitsiniarluni.*

*Ombudsmandi isumaqarpoq sulisumik kommunit piginnaatinneqarneranni inatsisikkut tunngavissaqarani pissutissaqanngitsumik iluaqutissarsisitsisimasoq.*

*Ombudsmandi isumaqarpoq kommunip sulisumi isimigut suliaritinneranut aningaasartuutunik akiliisimanagera aningaasartuuteqarnertut kommunip pisortani sulisitsisutut inissisimanani kommuninilluunniit piginnaatitsineq tunngavigalugu pisussaaffigisaatut isigineqarsinnaanngitsoq.*

*Ombudsmandip tamanna tunngavigalugu naliliinera unaavoq Kommuneqarfik Sermersuup sulisumi isimigut suliaritinneranut aningaasartuutunik akiliisimanagera aningaasanik inatsisikkut tunngavissaqarani atuinerusoq.*

*Ombudsmandip naliliinera aammattaaq unaavoq sulisup sulisorisatut pingaaruteqartutut qitiusumik inissisimanagera apeqqutaangitsoq.*

*Ombudsmandi tamanna tunngavigalugu isumaqarpoq kommunip sulisumi isimigut suliaritinneranut aningaasartuutinik akiliisimanera isorisariaqartuusoq.*

*Ombudsmandip suliamik suliarinninnini tamanna tunngavigalugu naammassivaa, annertunerusumillu iliuuseqaqqinnani.*

*(Oqaaseqaat 16. december 2022-meersoq, j.nr. 2022-907-0002)*

## **Tamatuma kingornatigut imatut oqaaseqaateqarpunga:**

### **1. Suut misissorpakka?**

**1.1.** Suliamik suliarinninninni Kommuneqarfik Sermersooq sulisumi isiminik suliaritinnerminut aningaasartuutaanik akiliinissaminut inatsisikkut tunngavissaqarsimanersoq isummerfiginiarlugu aalajangerpunga.

Inatsisartut Ombudsmandiat pillugu Inatsisartut inatsisaanni nr. 7-imi, 1. juni 2017-imeersumi § 15 innersuussutigaa, tassuunalu aalajangersarneqarpoq Ombudsmandi suliamik nammineerluni misissuiffiginnilersinnaasoq.

**1.2.** Ajornartorsiutinik taamaattunik siusinnerusukkut nammineq suliarinnissimangikkaangama Danmarkimi atuakkiaasimasut aamma Folketingip Ombudsmandiata periaasia oqaaseqaatinni arlalitsigut aallaavigisarpakka. Kalaallit Nunaanni inatsiseqartitsinikkut tunngaviup Danmarkimilu inatsiseqartitsinikkut tunngaviup pingaarnerusutigut assigiinnerat tamatumunnga pissutaavoq.

Oqaaseqaatiga imatut tulleriinnilerneqarpoq:

- Immikkoortoq 2. Suliaq pillugu naatsumik oqaatigisassat
- Immikkoortoq 3. Inatsiseqartitsinikkut tunngavigisaq
- Immikkoortoq 4. Kommuneqarfik Sermersuup isumaa
- Immikkoortoq 5. Uanga naliliinera

Oqaatigaara suliap ingerlasimanerata allaaserineqarnera oqaaseqaammut tulliummat.

## **2. Suliaq pillugu naatsumik oqaatigisassat**

Kommuneqarfik Sermersuup sulisumi isimigut suliaritinnerminut aningaasartuutaanik akiliisimanera tusagassiuutini allaaserisaq aqqutigalugu 30. marts 2022-mi malugaara. Tamannalu tunngavigalugu pisoq sukumiinerusumik paasiniallugu nammineerluni misissuiffiginninnermik aallartitsiniarlunga aalajangerlunga.

Kommuneqarfik Sermersooq 31. marts 2022-mi qinnuigaara suliami allagaatit kommunip sulisumi isimigut suliaritinneranut aningaasartuutini akiliisimaneranut tunngasut tamaasa uannut nassiuteqqullugit.

Ulloq taanna tusagassiuutitigut nalunaaruteqarpunga, Inatsisartullu Inatsisinut Ataatsimiititaliaat tamatuminnnga ilisimatillugu.

Kommunip suliami allagaatai 9. juni 2022-mi tiguakka.

Kommuni 6. juli 2022-mi qinnuigaara suliaq pillugu oqaaseqaateqaqqullugu suliamilu amerlanerusunik allagaateqarpat taakku nassiuteqqullugit.

Sulisoq isimigut suliaritinnerminut aningaasartuutiminik akiliunneqarsimasoq ilisimatitsissutitut allakkanik ulloq taanna nassippara, kommunimullu allakkama 31. marts 2022-meersut aamma 6. juli 2022-meersut assilineri ilanngullugit nassiullugit.

Kommunip suliaq pillugu oqaaseqaataa suliamilu allagaatit amerlanerusut 3. august 2022-mi tiguakka.

## **3. Inatsiseqartitsinikkut tunngavigisaq**

### **3.1. Isumaqatigiissutit assigiinngitsut (overenskomster/aftaler)**

Sulisut ataasiakkaat qanoq akissaasersorneqarnissaannik toqqaaniarnermi pisor-tani oqartussaasut akissarsianik akissarsiat atorfeqartitaanermilu atugassariti-taasut pillugit isumaqatigiissutit sulisut kattuffiitut susassaqtutut isumaqati-

giinniarsinnaatitaasunut isumaqatigiissutaasimasut tunngavigalugit tunniussinisaminnut aallaavittut taamallaat pisinnaatitaapput.

Sulisut suliaritinnerinut aningaasartuutunik akiliisarneq taakkununggalu tapiisuteqartarneq isumaqatigiinniarnernut tunngaviusunut isumaqatigiissutigineqarsimasunut ilaanngillat.

### **3.2. Kommunit piginnaatinneqarnerat**

Ungali paasinninnera unaavoq matuma isumaliutersuutiginnissaa pissusissami-soortuusooq, tassalu kommunit piginnaatinneqarnerat pillugu malittarisassat sulisut suliaritinnerinut aningaasartuutunik akiliinissamut periarfissiinersooq.

Kommunit piginnaatinneqarnerat tassaavoq malittarisassanut inatsisikkut aalajangersagaanngitsunut allassimanngitsunullu kommunit inatsisikkut tunngavissavimmik peqanngikkaluarlutik aningaasaqarnikkut aalajangersimasutigut iliuuseqarsinnaanerinut aalajangersaaviginnittunut taaguut.

Aningaasaqarnikkut iliuutsit kommunit piginnaatinneqarnerat tunngavigalugu kommunip iliuuserisinnaasai tassaagajupput innuttaasunut tunniuttakkanik assigiinngitsunik tunniussisarnerit. Taakku soorlu tassaasinnaapput peqatigiiffinnut, kultureqarnermut, timersornermut il.il. tapiissutit.

Kommunit piginnaatinneqarnerata inatsiseqartitsinikkut tunngavigisaa inatsisilerineq pillugu atuakkiani allaaserineqarpoq tassaasooq pisup pissusia/suussusia, kommunillu piginnaatinneqarnerat eqqartuussiviit ileqquattut isigineqarluni. Kommunit piginnaatinneqarnerat inatsiseqartitsinermi kimittussutsikkut tulleriinilersuinermit inatsisitut qaffasissuseqarluni inissisimavoq.

Taamaalillutik kommunit piginnaatinneqarnerat tunngavigalugu kommunit aningaasaqarnikkut iliuuseqarnissamut immikkut periarfissaat pillugit malittarisassat pisoq pineqartoq inatsisikkut aalajangersaavigineqareersimappat atorneqas-sanngillat.

Kommunip kommunit piginnaatinneqarnerat pillugu malittarisassat tunngavigalugit taamaallaat ingerlatanik kommunip ingerlatami soqutigisaqarnera naapertorlugu ingerlatsisinnaavoq tapersiisinnaalluniluunniit. Kommuni ingerlatami soqutigisaqassaaq ingerlataq kommunimi sumiiffimmi innuttaasuni ataatsimut pi-sariaqartitamik matussusiisuuppat. Kommunilli ingerlataq inatsimmik unioqqu-titsinani innuttaasunut ataatsimoortunut aalajangersimasunut killilersinnaavaa, taamatut killiliineq suliamut attuumassuteqartut tunngavigalugit pippat.

Kommunip soqutigisai soorlu tassaasinnaapput inuussutissarsiornermik ataatsi-mut siuarsaaneq, sunngiffimmi ingerlatat, kultureqarneq, takornariaqarneq kiisa-lu pigisamik aalaakkaasumik pisineq tuniniaanerlu.

### **3.3. Inunnik ataasiakkaanik iluaqutissarsisitsinissap inerteqqutigineqar-nera**

Kommunilli soqutigisaata innuttaasut ataasiakkaat aningaasartuutaannik akilii-neq inatsimmik unioqqu-titsisuujuunnaarsissinnaangilaa.

Taamaalilluni kommunit piginnaatinneqarnerat pillugu malittarisassani inuit ataa-siakkaat iluaqutissarsitinneqarnissaat inerteqqutigineqarpoq. Taamaalilluni kom-muni inatsisikkut tunngavissavimmik peqanngikkuni inunnut ataasiakkaanut inuit pineqartut ataasiakkaarlutik namminneq soqutigisaat tunngavigalugit kommunit piginnaatinneqarnerat pillugu malittarisassat tunngavigalugit tapiissuteqarsin-naangilaaq. Kommunip innuttaasut ataatsimoorfiattut innuttaasullu ataatsimut soqutigisaannik isumaginninnissamik siunertaqartutut isigineqarnera tamatu-munnga pissutaavoq. Inuit ataasiakkaat inuunerminni atugaasa qaffassarneqar-nissaat aningaasartuuteqartinnaveersarneqarnissaalluunniit kisiat siunertaralu-gu inunnik ataasiakkaanik tapersersuineq ataatsimoortumik soqutigisaananiluun-niit kommunip soqutigisarinnigilaa.

Qulaanili taaneqartut innuttaasoqatigiikkuutaanut innuttasunulluunniit ataasiak-kaanut aningaasatigut tapersiisinnaaneq mattutinngilaat, kommunip tapersiine-rani kommunip soqutigisaata tapersersorneqarnissaa pingaarnertut siunertaap-pat, ataatsimoortukkuutaanilu inuit inuunerminni atugaasa qaffassarneqarnis-saat il.il. siunertaangippat. Assersuutitut taaneqarsinnaavoq pensionisiaqartut

kommunip bussiinut ikissutissatut allagartanik pisineranni akikilliliinerit angallanermi aningaasaqarnikkut soqutigisatut inatsimmik unioqqutitsinani tunngavilersuutaasinnaasarsimasut.

### **3.4. Sulisut ajunngitsorsiaat**

Danmarkimi kommuninik nakkutilliinermi oqartussaasut periaasianni ilimagisaa-voq kommuninik inatsiseqartitsinermi inunntut ataasiakkaanut tapiissuteqarnissamik aallaavittut inerteqquteqarneq pisuni aalajangersimasuni saneqqunneqarsinnaasoq, kommunimi atorfeqartitaasunut tunniunneqartut pineqarpata.

Inuit ataasiakkaat iluaqutissarsisinneqartarnissaannik inerteqquteqarnermi atuutinningsut sulisut ajunngitsorsiaannut aalajangersimasunut tunngasut marluupput.

- A.** Tunniunneqartartut taamaattut sulisoqatigiinnut tamarmiusunut sulisoqatigiikkuutaanulluunniit erseqqissumik killilerneqarsimasunut atuuppata kommuni atorfeqartitaasut atugarissaarnerannik kommuninik piginnaatitsineq tunngavigalugu nalinginnaasumik isumaginnissinnaavoq. Taamaaliorneq tassaasinnaavoq aviisinik pisartagaqartitsineq, oqarasuaateqartitsineq imaluunniit timigissartarfimmi ilaasortaanermut akiliussineq.
- B.** Kommuni kommunip sulisitsisutut soqutigisai siuarsarniarlugit aningaasanik sulisunut ajunngitsorsiasatut kommuninik piginnaatitsineq tunngavigalugu tapersiisinnaavoq. Saneqqutsinermut tassunga atatillugu tunniunneqartartut ataasiakkaat eqqarsaatigalugit missingiussinikkut naliliisoqartartussaavoq, tassanilu aningaasartuutaasut sulisitsisup soqutigisaata sakkortussusianut sanilliullugit naapertuuttuussapput. Tunniunneqartut tamatumunnga peqatigitillugu sulianut attuumassuteqartut tunngavigalugit tunniunneqartassapput. Taakku tassaasinnaapput angerlarsimaffimmi angallattakkamik qaraasaiaqartitsilluni aaqqissuussinerit.

Sulisut ajunngitsorsiaannik sunik kommunip sulisuminut tunniussisinnaaneranik ataatsimut naliliinermi Danmarkimi nakkutilliinermi oqartussaasut periaasianni manna pingaartillugu isiginiarneqartarpoq, tassalu tunniunneqartussat taakku

suliffeqarnermut tunngasut ataatsimut isigalugit tunniunneqartarnerat nalinginnaasuunersoq.

Kommunik piginnaatitsineq pillugu inatsisilerinermi atuakkiaasimasuni Karsten Revsbechip atuakkiaani "Kommunernes opgaver"-mi pingajussaani 2015-imi naqitertinneqartumi quppernerit 59-94 aamma 403-405 kiisalu Niels Fengerip atuakkiaani "Forvaltningsret"-imi 2018-imi siullermik naqitertinneqartumi kapitali 18 innersuussutigaa.

### **3.5. Danmarkimi kommunik nakkutilliinermi qullerpaatut oqartussaasuusup, Indenrigsministereqarfiup, periaasia**

Kommunik piginnaatitsinerup inunnik ataasiakkaanik iluaqutissarsisitsinermut atatillugu atorneqartarnera eqqarsaatigalugu Kalaallit Nunaanni Kommunik Nakkutilliisoqarfik periaatsiminik matumunnga attuumassuteqartumik tamanut saqqummiussisimanersoq ilisimanngilara.

Taamaattumik Indenrigsministereqarfiup, Danmarkimi kommunik nakkutilliinermi qullerpaatut oqartussaasuusup, suliaatai marluk tunngavigaakka.

Indenrigsministereqarfiup suliami Farum Kommunemeersumi 1993-imi oqaatigaa kommunit inatsisikkut tunngavissaqaratik inunnut ataasiakkaanut aningaaqarnikkut tapersiisinnaannginnerat nalinginnaasumik ilimagisaasoq.

Oqaaseqaammi pineqartumi Indenrigsministereqarfiup aammattaaq oqaatigaa kommuni borgmesterip eqqartuussivikkut suliaassanngortinneqarnerani borgmesterip eqqartuussissuserisumit ikiorneqarneranut inatsimmik unioqqutitsinani aki-liussisinnaasoq, suliarimi borgmesterip borgmesteritut inuiaqatigiinni suliakkerneqarneranut tunngasuummat.

Indenrigs- og Socialministereqarfik kommunit innuttaasunik kommunimi suliasanut atatillugu nammineq kajumissusertik tunngavigalugu soorlu ilinniagassalerinermi ikiuuttutut pulaartartutulluunniit suliniuteqartunut ajutoorsinnaanermut akisussaaneermullu ataatsimoortumik sillimmasiiviginninnissamat periarfissaqarnerat pillugu suliami 2016-imi oqaaseqaateqarpoq.

Ministereqarfiup oqaatigaa nammineq kajumissuseq tunngavigalugu suliniuteqartut ajutoorsinnaanermut akisussaaneermullu ataatsimoortumik sillimmasiivigineqarnissaannut inatsisikkut tunngavissaqanngitsoq. Sillimmasiinerit inunntut a-taasiakkaanut kommunip inatsiseqartitsinikkut taamaaliorfigissallugit pisussaaf-feqarfiginngisaanut iluaqutissarsisitsisuusussaaneerat ministereqarfiup pingaartil-lugu isiginiarpaa.

Suliat taakku Indenrigsministereqarfiup nittartagaani uani atuarneqarsinnaap-put: <https://im.dk/lovstof/resumedatabasen>.

#### **4. Kommuneqarfik Sermersuup isumaa**

Kommuneqarfik Sermersuup uannut oqaaseqaammini 3. august 2022-meersumi oqaatigaa peqqissutsimut tunngasutigut namminersortunit suliaritinnermut ata-tillugu aningaasartuutinik akiliunneqarneq kommunimi sulisut nalinginnaasumik ajunngitsorsiassarinnikkaat.

Kommunip uannut oqaaseqaammini makku aammattaaq oqaatigai:

“[A-p] isimigut suliaritinnissamik neqeroorfigineqarnissaanik tamatumalu kingornati-gut akiliunneqarnissaanik aalajangerneq kommunip nammineq soqutigisaanik nalilii-viginnineq tunngavigalugu pisimavoq. Kommuneqarfik 2020-mi upernaakkut Coro-namik nappaalanersuaqarneranit assut eqqugaasimavoq, tamatumunngalu atatillugu kommunimi innuttaasunut tunillaassuuppallaalinnginnissaa qulakkeerniarlugu nukip-passuit atorneqarsimallutik.

[...]

[A-p] Kalaallit Nunaanni Coronamik akiuiniarluni suliniuteqarnermi nuna tamakkerugu ata-qatigiissaarineq isumagisaraa, taamaattumillu sulinermini suliassat ilungersunar-tut isumagisaralugit. Naliliisoqarpoq sulisup taamatut pingaaruteqartumik inissisima-sup pissutsit ajorteruttorneranni napparsimalluni sivisuumik sulinngittariaqarnera a-torfimminilluunniit soraartariaqarnera Corona akiorniarylugu suliniuteqarnermut ajorto-rujussuussasoq.



[...]"

Kommunip ilassutitut oqaatigaa suliap sulianut allanut tunngavissaliisuunissaa siunertarineqanngitsaq.

## **5. Uanga naliliinera**

Uanga paasinninnera unaavoq sulisut ataasiakkaat qanoq akissaasersorneqarnissaannik toqqaaniarnermi pisortani oqartussaasut akissarsianik akissarsiat atorfeqartitaanermilu atugassarititaasut pillugit isumaqatigiissutit sulisut kattuffiunut susasaqartutut isumaqatigiinniarsinnaatitaasunut isumaqatigiissutaasimasut tunngavigalugit tunniussinissaminnut aallaavittut taamaallaat pisinnaatitaasut. Sulisut suliaritinnerinut aningaartuutinik akiliisarneq taakkunungalugu tapiissuteqartarneq isumaqatigiinniarnernut tunngaviusutut isumaqatigiissutigineqarsimasunut ilaangillat.

Naak kommunit piginnaatinneqarnerat inuit ataasiakkaat iluaqutissarsisinnerqarnissaannik aallaavittut inerteqqummik imaqaraluortoq kommunit kommunit piginnaatinneqarnerat tunngavigalugu sulisunik nalinginnaasutigut isumassuinermut aningaasatigut tapersiinissaannut kiisalu kommunip sulisitsisutut soqutigisaanik sulisunut ajunngitsorsiaqartitsinikkut siuarsaanissaanut periarfissaqarpoq.

Inuit ataasiakkaat iluaqutissarsisinnerqarnissaannut periarfissaqarpoq, atorfeqartitaasut atugarissaarnerannik isiginninneq aallaavigalugu sulisunik nalinginnaasumik isumassuineq pineqarpat. Uanga paasinninnera unaavoq aqqissuussinerup pineqartup sulisunut tamarmiusunut sulisoqatigiikkuutaanulluunniit erseqqissumik killilerneqarsimasunut atuunnissaa piumasaqaataasoq.

Kommuneqarfik Sermersuulli uannut oqaaseqataanit 3. august 2022-meersumit ilaatigut erserpoq peqqissutsimut tunngasutigut namminersortunit suliaritinnermut atatillugu aningaasartuutinik akiliunneqarneq kommunimi sulisut nalinginnaasumik ajunngitsorsiasarinngikkaat, sulisullu pineqartup isimigut suliaritinneranut aningaasartuutinik akiliineq immikkorluinnaq ittuusoq.

Taamaalilluni isitigut suliaritinnermut aningaasartuutunik akiliineq kommunip sulisunik nalinginnaasutigut isumassuineranut ilaanngilaq.

Inuit ataasiakkaat iluaqutissarsisinnerqarnissaannut aammattaq periarfissaqarpoq, kommunip sulisitsisutut soqutigisaminik siuarsaaniarluni sulisut ajunngitsorsiaannut aningaasaqarnikkut tapersiiffigisaanik. Sulisut ajunngitsorsiaat suliffeqarnermut tunngasut ataatsimut isigalugit nalinginnaasuunersut ataatsimut naliliineq Danmarkimi nakkutilliinermi oqartussaasut periaasianni pingaartillugu isiginiarneqartarpoq.

Paasisara unaavoq sulisup isimigut suliaritinneranut aningaasartuutunik sulisitsisup akiliinera suliffeqarnermut tunngasuni pingaartumilluni kommunimi immikkorluinnaq ittuusoq. Taamaattumik uanga naliliinera unaavoq sulisut ajunngitsorsiaat nalinginnaasoq pineqanngitsoq, inummulli ataatsimut iluaqutissarsisitsineq kommuninik piginnaatitsinermi inatsisikkut tunngavissaqanngitsoq pineqartuq.

Kommunip uannut oqaaseqaammini 3. august 2022-meersumi oqaatigaa sulisup pineqartup kommunimi coronamik nappaalanersuaqarnerani suliaq qitiusumik pingaaruteqartoq isumagisarigaa.

Uanga naliliinera unaavoq sulisup pineqartup coronamik nappaalanersuaqarneranut atatillugu suliamik qitiusumik pingaaruteqartumik isumagisaqarnera isumagisaqannginneraluunniit apeqqutaanngitsoq/sunniuteqanngitsoq, pineqartummi inissisimanerata inunnik ataasiakkaanik iluaqutissarsisitsinissamik inerteqquteqarneq atorunnaarsissinnaanngimmagu.

Kommunip uannut oqaaseqaataanit 3. august 2022-meersumit erserpoq kommunip sulisup qitiusumik pingaarutilimmik inissisimanera tunngavigalugu naliliisoq isitigut suliaritinnermut aningaasartuutunik akiliineq kommunip nammineq soqutigisarigaa.

Kommunimi atorfeqartitaasunut tunniunneqartut eqqarsaatigalugit isumaqarpunga kommunip sulisitsisutut nammineq soqutigisaa taamaallaat pisuni sulisunut ajunngitsorsianut kommuninik piginnaatitsinermi killissaliunneqartut iluanni tunniunneqarsinnaasunut tunngasuni soqutiginaateqartoq.

Pisumi pineqartumi sulisut ajunngitsorsiaat pineqanngillat, inummulli ataatsimut iluaqutissarsisitsineq pineqarluni. Taamaattumik uanga naliliinera unaavoq kommunip sulisitsisutut nammineq soqutigisaanik isiginnineq suliamut attuumassuteqanngitsoq.

Isumaqarpunga kommunip sulisumi isimigut suliaritinneranut aningaasartuutini akiliinera aningaasartuuteqarnertut kommunip pisortani sulisitsisutut kommunilluunniit piginnaatinneqarnerat tunngavigalugu pisussaaffigisaatut isigineqarsinnaanngitsoq.

Uanga tamanna tunngavigalugu naliliinera unaavoq Kommuneqarfik Sermersuup sulisumi isimigut suliaritinneranut aningaasartuutini akiliinera inatsisikkut tunngavissaqanngitsumik aningaasartuuteqarnerusoq.

Tamanna tunngavigalugu isumaqarpunga kommunip sulisumi isimigut suliaritinneranut aningaasartuutini akiliisimanagera isorisaritariaqartuusoq.

Suliami annertunerusumik iliuuseqaqqissanngilanga, suliamillu suliarinninnera matumuuna naammassineqartutut isigalugu.

Oqaaseqaat manna oqaaseqaammi pineqartut ilisarnarunnaarsillugit nittartakkanni tamanut saqqummiunneqarumaarpoq 2022-milu ukiumoortumik nalunaarutinni eqqaaneqarumaarluni.

## **SULIAP INGERLASIMANERATA ALLAASERINEQARNERA**

Kommuneqarfik Sermersuup sulisumi nammineq aningaasartuutaanik akiliisimanagera pillugu nammineerluni misissuiffiginninnermik suliaq 31. marts 2022-mi aallartippara, kommunilu qinnuigalugu suliami allagaatit uannut kingusinnerpaamik 29. april 2022-mi nassiateqqullugit. Tusagassiuutitigut ulloq taanna nalunaaruteqarpunga. Tassannga makku erseput:

“Allagaatit [A-p] isiminik suliaritinneranut Kommuneqarfik Sermersuup akiliisimanagera pillugu tusagassiuutitigut eqqartorneqartunut attuumassutillit tamaasa nassiateqqullugit ullumi Kommuneqarfik Sermersooq qinnuigaara.

Tamatumunnga tunuliaqutaavoq pisimasoq pillugu oqaaseqaateqarnissannut pissutigissallugu naammannersoq naliliinissannut tunngavissaqarniarlunga paasisaqarnissara kissaatigigakku, tamatumani malittarisassat pisortat ingerlatsineranni atuuttut Kommuneqarfik Sermersuumit malineqarsimanersut ilanngullugu eqqarsaatigalugu.”

Inatsisartut Inatsisinut Ataatsimiititaliaat ulloq taanna nalunaarfigaara nutaarsiassaq “Sulisup nammineerluni aningaasartuutaanik Kommuneqarfik Sermersuup akiliisimanagera pillugu allagaatinik paasitinneqarumalluni Ombudsmandi qinnuteqarpoq”-mik qulequtalik Inatsisartut Ombudsmandiata nittartagaatigut tamanut saqqummiukkiga.

Sulisuma ilaata Kommuninik Nakkutilliisoqarfiup Allattoqarfia 20. maj 2022-mi attaveqarfigaa, suliaq Nakkutilliisoqarfimmi suliarineqarnerasoq paasiniarlugu. Suliaq Nakkutilliisoqarfimmi suliarineqanngitsoq Nakkutilliisoqarfiup Allattoqarfiata oqaatigaa.

Kommunip suliami allagaatai 9. juni 2022-mi tiguakka. Allagaatit taama kingusitsigisukkut tiguneqarnerat kommunip e-mailkkut uanga nassiuussannik kingullernik tigusiniarnerani it-kkut ajornartorsiuteqarnermik pissuteqarpoq.

Suliami allagaatini Kommuneqarfik Sermersuup aningaasartuutininut uppersaataanit 12. marts 2021-meersumit ersepoq [A] “Katsorsartinnermut akiliutinik kommunip pisortaaneranut [...-mut] isumaqatigiissut tunngavigalugu utertitsilluni tunniussineq” aqqutigalugu 22.000 kr.-nik tigusaqartussaasoq.

Akiliutinik utertitsilluni tunniussineq taanna suliaritinnernut napparsimmavissuarmit namminersortumit akiligassiissutininut marlunnut katillugit 22.000 kr.-nik aningaasartalinnut tunngasuvoq.

Kommunip pisortaanerata [...-p], kommunip pisortaanerata tulliaata [...-p] [A-llu] mailikkut allaffigeqatigiittarneranni allagaasimasut suliami allagaatini aammattaaq ilaapput.

[A] e-mailimi 15. maj 2020-meersumi ilaatigut imatut allappoq:

“Hej [pisortaanerup tullia] aamma [pisortaanerup tullia]

Maani ingerlatseriaatsimi isitigut suliaritinnissamut periarfissaqarnera DIN-mut masakkut oqaloqatiginnissutigereerpara – siusinnerpaamik sap. ak. 44 eqqartorpaat.

Taamaattumik isinnik Danmarkimi suliaritinnissamik neqeroorutersi assut qujarullugu atorussuppara.” (Ombudsmandeqarfimmi nutsigaavoq)

[Pisortaanerup tullia] [A-mut] e-mailikkut akissummini 15. maj 2020-meersumi imatut allappoq:

“Asasara [A]

Sanami taama sivisutigisumik utaqqisariaqarneq uggornaq.

[...]

Piareersaleriiginnarit, sapinngisamik pilertornerpaamik utersinnaaniassaatit.

In.

[Pisortaanerup tullia]” (Ombudsmandeqarfimmi nutsigaavoq)

Suliami allagaatit nassiunneqartut kommunip isinik suliaritinnermut aningaasartuutunik akiliisimanera pillugu eqqartuussissuserisoqatigiinni inatsisilerituup allakkiaanik 15. marts 2022-mi suliarineqarsimasumik kiisalu [A-p] atorfinitsinneqarnera pillugu isumaqatigiisummik aammattaaq imaqarput.

Kommuneqarfik Sermersooq suliami amerlanerusunik allagaateqarpat taakku kiisalu suliaq pillugu oqaaseqaat uannut nassiuteqqullugit 6. juli 2022-mi qinnui-gaara.

Ilisimatitsissutitut allakkat [A-mut] ulloq taanna nassiuppakka, kommunimut allakkama 31. marts 2022-meersut kiisalu 6. juli 2022-meersut assilineri ilanngulugit.

Kommunip suliaq pillugu oqaaseqaataa ilanngussartalik 3. august 2022-mi tiguarra.

Kommunip oqaaseqaataanit ilaatigut makku erserput:

"[A-p] isimigut suliaritinnissamik neqeroorfigineqarnissaanik tamatumalu kingornatigut akiliunneqarnissaanik aalajangerneq kommunip nammineq soqutigisaanik naliliiviginninneq tunngavigalugu pisimavoq. Kommuneqarfik 2020-mi upernaakkut Coronamik nappaalanersuaqarneranit assut eqqugaasimavoq, tamatumunngalu atatillugu kommunimi innuttaasunut tunillaassuuppallaalinnginnissaa qulakkeerniarlugu nukipassuit atorpeqarsimallutik.

[...]

[A-p] Kalaallit Nunaanni Coronamik akiuiniarluni suliniuteqarnermi nuna tamakkerlugu ataqatigiissaarineq isumagisaraa, taamaattumillu sulinermini suliassat ilungersunartut isumagisaralugit. Naliliisoqarpoq sulisup taamatut pingaaruteqartumik inissisimasup pissutsit ajorteruttorneranni napparsimalluni sivisuumik sulinnittariaqarnera atorfinnilluunniit soraartariaqarnera Corona akiorniarlugu suliniuteqarnermut ajortorujussuussasoq.

[...]

Peqqissutsikkut namminersortunit suliaritinnermut aningaasartuutinik akiliunneqarneq Kommuneqarfik Sermersuumi sulisunut nalinginnaasumik ajunngitsorsiassaangilaq. Pisumi matumani pineqartoq tassaavoq pisoq immikkorluinnartoq ittoq, aalajanger-toqarlunilu nunarsuaq tamakkerlugu nappaalanersuaqarnerata nalaani inuiaqatigiinni pisoq immikkorluinnaq ittoq aallaavigalugu.

[...]

Taamaattumik pisup matuma immikkoorluinnartup kommunip sulisuisa namminersortunit suliaritinnerinut peqqissutsikkulluunniit allatigut kiffartuunneqarnerinut aningaasartuutinik akiliisarnissamut siunissami tunngavissaliisuunissaa Kommuneqarfik Sermersuup siunertarisimannngisaannarpaa." (Ombudsmandeqarfimmi nutsigaavoq)